

SECONDA SESSIONE URDINARIA DI U 2022
RIUNIONE DI I 27 E 28 D'APRILE DI
2023

2EME SESSION EXTRAORDINAIRE DE 2022
REUNION DES 27 ET 28 AVRIL 2023

2023 / 01/038

**REPONSE DE MONSIEUR LE PRESIDENT DU CONSEIL EXECUTIF A LA QUESTION DEPOSEE
PAR MONSIEUR SAVERIU LUCIANI AU NOM DU GROUPE AVANZEMU**

Objet : Lingua Corsa

Vi ringraziu pè a vostra quistione. A lingua, a so difesa è a so prumuzione hè una primura maiò chi ci tene à core à tutte è à tutti. Dunque lasceraghju da cantu l'aspettu un pocu stuzzicaghjolu di a vostra quistione, vi cunnoscu, a sò ch'è a fate per stimulammi, ci aghju da risponde nant'à u fondu. Nantu à u fondu hè vera chì tutti quì, tutti quelli chì pensanu à una Corsica chì campi u corsu tutti i ghjorni, tutti quelli chì volenu què è chì s'impegnanu per què pensanu ch'è no ùn ne femu micca abbastanza.

Diceraghju ch'ùn ne feremu mai abbastanza. Ci hè statu un travagliu ch'è statu fattu da 2015 à 2021, erate in situazione di rispunsabilità, erate voi à ammaestrà, sottu à a mo presenza, à cantu à a mo presenza, a pulitica di a lingua, l'avete fatta cun core, perchè a difesa di a lingua hè stata sempre una di e vostre primure maiò, da tanti anni. Emu circatu à cuntinuà inde 'ssu solcu, mudifichendu è migliurendu s'ella hè pussibile ciò ch'è statu fattu perchè hè vera chì i ghjorni chì passanu contanu doppiu o triplice. Allora in corte parolle, à u livellu puliticu glubale, ci hè statu 'ssu raportu d'orientazione, chì cerca, è hè stata rivendicata, à passà da una rivendicazione di cuufficialità, ch'ellu ci vole à mantene è più chè mai, a feremu in seme, pensu, in u quattru di e discussione di Beauvau, passà da una rivendicazione di cuufficialità à una cuufficialità campata ogni ghjornu. Un travagliu hè statu iniziatu, u Cunsigliu esecutivu hà vulsutu chì l'Assemblea di Corsica sia impignata à parà incù u Cunsigliu esecutivu inde 'ssu travagliu, magiurità è opposizione. Tengu à salutà u travagliu chì hè statu fattu, dipoi parechje simane è chì cuntinueghja, da a Cummissione di a Cultura, da a Cummissione di a cultura

cù Muriel Fagni , da a Commissione di u sviluppu economicu presidata da Nadine Nivaggioni, cun parecchie riunioni, a sapete, ci avete qualchì volta participatu, cù assai incontri, pusitivi assai, s'hè trattatu per esempiu di u ciculu di a vita, di a zitellina, di l'aniziani è i capi bianchi, circhendu à passà da una rivendicazione linguistica, ch'è no cuntinuemu à purtà, à una pulitica di a lingua ch'emu messu in ballu durante sei anni, à una vera pulitica linguistica, più ambiziosa è più larga.

Emu cuminciatu à cuncretizà. Allora, di sicuru, pudete sottulineà sò ch'ùn cunvene micca, ma vogliu quantunque ramintà chì di manera concreta, per esempiu emu messu in ballu, micca messu in ballu ma in tutti i casi sustinutu l'azione di Scola corsa per l'insignamentu immersivu. Emu avutu discussione pulitiche nantu à a piazza di l'insignamentu privatu, assuciativu, è a piazza di u corsu inde l'insignamentu publicu, dunque emu dettu è ripetutu ch'ùn si trattava micca di tralascià l'insignamentu publicu pè sustene u privatu ma chì l'associ rispundianu à una dumanda forte, chì ghjera una manera di mostrà ch'è no ci impatruiniamu di a nostra lingua, è attempu cuntinuemu di sicuru à sustene a piazza di l'insignamentu bislinguu è immersivu inde u settore publicu.

Dunque u sustegnu à Scola Corsa incù azione, ancu à u livellu francese, ci vole à ramintà quantunque chì emu avutu u sustegnu di l'Associu di e Regione di Francia, puru s'è no ùn cunsideremu micca a nostra lingua cum'è una lingua regiunale, ci hè oghje, purtata à l'unanimità da e Regione di Francia, una dumanda di mudifica di a Custituzione per ch'ellu sia custituzionalizatu l'insignamentu immersivu. Hè quantunque qualcosa , mi pare, d' impurtante. Emu messu in ballu dinù, a sapete, e Case di a Lingua, chì si sparghjenu inde tuttu u territoriu, sò dimarchje chì mi parenu assai interessante perchè sò purtate da l'attori. Al di là d'esse purtate da l'attori, venenu à fà a dimostrazione chì u corsu ùn hè micca solu un ogettu da amparà, ma hè l'attrazzu per apresi nantu à u mondu. Dunque, una dimarchja nova chì avà hà da sbuccà da quì à pocu, pensu, nantu à un raportu di pruposte chì sarà sottumessu à u dibattitu è à u votu di l'Assemblea di Corsica, è un travagliu chì hà assuciatu tutti l'attori di a lingua è mi pare chì ghjè qualcosa di necessariu è di fundamentale.

Divvi dinù, siate assicuratu, ch'aghju pigliatu l'ingaggiamentu di duppià i crediti di u CPER, hè mantinutu, è saranu sguasi 20 milioni d'eurò messi da a parte di a Cullettività induve ùn ci n'era chè 10 inde u Pianu di prima. Dunque duppiemu i crediti è anu da vene à sustene à tutti quelli chì cercanu à fà campà a lingua. Pè l'affare di a nostra assenza à u CALCC qualchì ghjornu fà, a sapete, hè statu un sbagliu di i servizii di u Retturatu, postu chì ripetenu assai micca sempre tutt' à fattu di manera sana è curretta sò chì si dice in i cunsigli d'amministrazione o à e riunioni, forse sapete chì u Rettore s'hè scusatu, hà dettu chì s'eranu scurdati i so servizii di unepoche d'invitazione, ma u ripresentante di u gruppu magiuritariu, Petr'Antò Filippi, era presente è erate ripresentati ancu voi è ci hè statu un travagliu.

Nantu à u listessu versu, u Cunsigliu accademicu territoriale, hè vera, ùn hè più statu adunitu. Hè statu cunvucatu da quì à pocu è dunque emu da travaglià è pensu di manera generale chì u Rettore hè piuttosto apertu per stà à sente a nostra vulintà è a nostra brama. Aghju da finisce quì dicendu chì a vulintà a scumpartimu, u bisognu ci hè, ci hè u focu à meza casa è oghje a sola strada chì conta hè quella di u niguziatu glubale incù u Statu per sbuccà nantu à a cuufficialità è un statutu di dirittu è inde i fatti.

A ringraziavvi !